



ATASSUT

UPA14/51

Knud Kristiansen

28.05.2014

Kommuunini politikkimi nunalu tamakkerlugu politikkimi angutit arnallu naligiinnerusumik sinniisoqalernissaat siumut isigaluni qanoq qulakkeersinnaaneripput pillugu apeqqutegaat aallaavigalugu oqallittoqarnissaanik siunnersuut.

(Inatsisartunut ilaasortaq Naaja H Nathanielsen, Inuit Ataqatigiit)

ATASSUT-miit oqallinnissamut siunnersuuteqartoq qutsavigaarput.

ATASSUT-mi pingaartilluinnarparput, kommuunit aqunneqarneranni, aammalu nuna tamaat naalakkersuinermi sulinermi, angutit arnallu naligiinnerusumik sinniisoqarfigineqassasut.

Pingaaruteqarpoq, inuiaqatigiit ineriartorneranni isummat siammasissut, aammalu nalilersuilluarneq anguniarlugu isummeriaatsit tamakkiisut inissaqartinneqarlutik sinniisuuffigineqarnissaat. Tamanna inuiaqatigiit ineriartornikkut tamakkiisumik isiginneraaseqarluni aqunneqarnerannik kinguneqassaaq.

Nunatsinni oqaluttuarisaaneq qiviarutsigu ineriartorneq sukkasimaqaaq. Tassani inuit tamarmik pisariaqartinneqarsimapput, ilinniartitaanikkut, atuartitaanikkut, aammalu suliffissuaqarnermi tamakkiisumik arnat angutillu atorfissaqartilluarneqarsimapput.

Taamaattorli ileqqut, qangaaniilli periutsit inooriaatsillu aallaavigalugit inuuneqarneq ilaatigut nunatsinni annertuumik allanngartinniagassaasimavoq oqimaatsoq. Tassami ileqqut allanngartinniarneri piffissaq sivikitsoq kisiat atorlugu allanngortoqarsinnaaneq ajormat.

Illua-tungaatigullu aamma soorunami inuuniarnermi “ikioqatigiiinneq” immikkut isigisariaqarpoq, ukiuni untritolippassuarni inuiaqatigiittut pisariaqarsimasoq, piniarnermik inuussutissarsiornermi arnat angutillu akisussaaffimmik avitseqatigiinnerat pisariaqarluinnarsimavoq, inuiaqatigiittut



ATASSUT INATSIARTUNI

ataannarnissamut, naak ullumikkut taama annertutigisumik atuutinngikkaluartoq, suli ilaatigut pisariaqarmat.

Ilinniartitaanikkut nunatsinni maannakkut arnat siuttuupput. Tamanna nuannaarutissaavoq. Illuatungaatigullu aamma soorunami angutit eqqarsaatigalugit suliassaarpugut annertuumik, taakkunungalu unamminartuuvoq, ilinniartitaanikkut atuartitaanikkullu qaffassaqqinnissaat.

Inuiaqatigiinnut kaammattuineq tamatigut pisariaqarpoq. Politikkikkut sulinermi arnat angutillu naligiinnerusumik sinniisoqarluassappata, inuiaqatigiinni politikkikkut sulineq tamatigoornerusumik sammineqartariaqarpoq. Sulimi malunnarmat angutaanerusut politikkikkut sulinissamut sassartaarnerusartut. Meeqqat atuarfiini, ilinniarfinilu polikkimik suliaqarneq annertunerusumik qaammarsaatigisariaqarpoq. Taamaasiornikkut assigiimmik soqutiginnineq ineriartortinneqassaaq.

ATASSUT-miit oqallisissiamut qujavugut.